

16 MAR 1996

Kelantan-pilihan raya

UMNO KELANTAN MULAI SUSUN STRATEGI PILIHAN RAYA

IPOH, 16 Mac (Bernama) -- Pemimpin-pemimpin UMNO Kelantan akan berkumpul di Langkawi selama tiga hari mulai esok bagi menghadiri satu kursus yang akan menyusun strategi untuk menghadapi pilihan raya akan datang.

Perdana Menteri Datuk Seri Dr Mahathir Mohamad selaku Pengerusi Badan Perhubungan Umno Kelantan dijangka hadir, kata timbalan pengerusi badan itu Datuk Annuar Musa di sini hari ini.

Kursus itu yang membabitkan semua ketua bahagian serta ketua-ketua Pergerakan Pemuda dan Wanita di negeri itu penting memandangkan kedudukan Umno di Kelantan semakin kukuh, katanya ketika berucap pada majlis sambutan aidilfitri pemimpin-pemimpin UMNO Kelantan dan Perak di sini. Yang turut hadir ialah Menteri Besar Perak Tan Ramli Ngah Talib.

Annuar yang juga Menteri Pembangunan Luar Bandar berkata walaupun UMNO tidak dapat menawan Kelantan pada pilihan raya umum tahun lepas tetapi jumlah undi untuknya bertambah berbanding pilihan raya umum tahun 1990.

Undi populariti UMNO Kelantan meningkat daripada 23 peratus pada pilihan raya umum 1990 kepada 43 peratus tahun lepas.

"Kami berharap pada pilihan raya umum akan datang ia akan meningkat kepada lebih 67 peratus," katanya.

Annuar juga berharap kempen menjelang pemilihan UMNO dijalankan tanpa sentimen kenegerian dan puak.

Mengenai sama ada beliau akan bertanding merebut jawatan Ketua Pemuda, katanya : "Biarlah kedudukan Pemuda tenang dahulu sebelum saya membuat keputusan." -- BERNAMA

HK MAI